

Timotini Luhuva Nampa

1 Pauló Gizo Amimó

Timotini nónohá amike gizo ami gakó

1 ¹Neza Paulona Ómasi lugutó vizeaká vémini gakotó itó Izesu Kilistokumú lagata losi gelemoko ageva oaká nouni vémini gakotó neza Izesu Kilistoni aposolo noutímina, ²^a Timotiga monó gapogú gelémo muluke gelémo lá uke gipáne noane loko noluve. Gef luhuva imane gizo nogumuve. Ómasi ametehe itó Guivahanite Izesu Kilistó agika hize gemeko nasahílí ogetoko hulu ale utó ogetino.

Soza saza monokumú gizapa itive loko agata alimó

³Neza nene Masetonia mikasigú vinogo nouke gagata aleko lo gumumómámini ozo. Lá oko nene Epeso numutoka goha miní ameko minozo. Minoko vejená lugáa nenete soza saza monó apí i nikememó nene ahulatave loko lokimikako ahulataze. ⁴Makó nene gitene gakó itó vejená hizi hutílí iki minimi ite gakó nenémini mogona likago, nenemú iteká lemeká okago, li volaló imaló goha ikave. Lá ikago, Ómasimú gili alévolé iki gelekelé itata gapo nene utó amive. ⁵Monó loakalímíni gihiláa lá oko utó okiko etanogo ive: Ligika nagamí zeko minoko, ligikagú gakó golesa makó minamiko, ligikatunú gele alévolé oko minoko ligika eza amiko eza amiko oaká nene utó itive. ⁶Ve lugáa nenete monó gapo imane ángi ahuliki kemegeza amiake, ha gakó gihila nomimó nene ligili hagili iaká niave. ⁷Lá iake, kezáinimú nene Mosé lo hukoko li gakó lainim-oketatune liki amuza miliaká niamóza, gakó nilamó nenémini mogona itó gakó makó alévoleka liki nilamó nenémini mogona gili vevesamave.

⁸Leza nene lo hukoko li gakokumú nene láa loko gelenoune: Nene gakó lamaná nemóza, Mosé lo hukoko li gakó itó haitopaitó li hukina gakó nene mogona lamanatokó ámegetatunimó nene lamaná onoive. ⁹Leza láa loko gelenoune: Vegenalite li hukina gakó nene lihimáini nomi vegenalitini

^a 1:2 Apo 16:1

mututoni nomive. Li hukina gako gili ahuliaká nia vejená, itó gínikaha ita vejená, monóini nomi vejená golesa, kigika golotuva latimó, monokumú gelema vejená, izóikini améikini itó haitó vejenaki kipili hiliaká a vejená, ¹⁰mokoló vejená, vémohe venalímohe agivelahitoka voko gímizekiko akiaká, vejená gumina aleaká, sozaló vejená, hakupá gako li kimiaká vejená, itó netá lugáa nenémo monó gakolímíni gala veva nene netá nenémínaa aliaká nia vejenalitíni mututoni neve. ¹¹Ámina monó gako nenémo Ómasímo gako lamaná lehizenetamó nenegú noike lelí Ómasi lagámíni lapanala lo utó oaká noive.

Ómasímo agika hize amikumú agepoka limó

¹²Zámuza lehizenetake luhúsáne ale gilitoneta ve Guivahanite Izesu Kilistoni agepoka loaká nouve. Áisi nenikumú giligo, aí gakató amegesaló moloaká ve loló nougo, gelekelé onetatane loko nelémo etó okave. ^{13b}Goí oko nene alevo letovo uke gopoguni nomolotuke agulizá ale mumusopa zeaká umó nene neza aí monó gele guni amuke gatizá minokuke, lá ukumú agika hize nemeake, ¹⁴Guivahanitémo nasahilí napa onimiake, Izesu Kilistotoka voko gímizumómave loko gele alévolé oaká itó agika nemeaká netá nene lehizenimikave. ¹⁵Izesu Kilistó eza lihimáinigi vejená kugutó vizitove loko mikasiuka limi gako nene lamaná neve. Mukitó gele alesató neve. Itó netá golesa aliaká a vetini guivahani nénisi nene noumóza, ¹⁶Izesu Kilistó eza asene zenetoloko vova vova imó nenémíni mogona nelepizitove loko Ómasímo agika hize nimimó nene hanuvamú nomive. Vejená nenete alikaloka není mogona ángiiki gili alévolé iki alévolé kemetameni alitave loko lá imó neve.

¹⁷Alévolé Guivahani napa, helemoakalímíni, itó ángiamoakalímíni, Ómasi hamokó aí agulizá ale otekuko, aí lapaná nenémo mino lúaló moloko minatize. Lamaná.

¹⁸Gipáne Timotio, goí oko Ómasímíni agepagutí gako geikumú utó imó nenemú gelekuke láa loko nologetuve: Ámina gako limó gelémo vávani okiko, lovagú iaká niamó nenémínoko monó hoza alévolé oko alezo. ¹⁹Lá okoko, gele alévolé o minoko gigikagú némini manámíni gako golesa minamiko, monó hoza alezo. Vejená lugáa nenete kigika lapanaki minoaká gako nene gili ahuliake, Ómasímú gele alévolé oakatíni nene ahuliake, kigika gologolo sokago, ²⁰latila inigi amó keikutí ve losi Haimeniaisiki Alesateki niasive. Satani agizakú vi hiliki Ómasímú alivi letivi amitái mogona gilitáive loko kimisele ahulokuve.

Ómasiloka lituni gako

2 ¹Gako imane goí oko iteko alévolé itive loko neza gagata aleko noluve. Lekeza vejená mukikumú voká voká liki Ómasiloka liki

^b 1:13 Apo 8:3; 9:4,5

eza hize lé oketative liki keikumú Ómasi agepoka liki minatave loko nologetuve. ²Itó lekeza legesó iki hulu iki monokú lamaná iki minikiko, vejená nenete nemú manamú giliko lamaná itive liki kugulizaki ve napamú itó mukí gizapa vejenakumú Ómasímo hize lé oketative liki numuna hoza alilo. ³Nenémó lamaná inogo ive. Itó lugutó vizeaká Ómasi eza nenemú giligo etoaká noive. ⁴Eza nene vejená mukitoka kugutó vizitove loko itó gakó gihila ali lá itave loko geleaká noive. ⁵Ómasi hamokó noive, itó Ómasi leza vejenaki agata helega helega nouko ve hamokó Izesu Kilistó holutegú ve loló i ve nene ⁶vejená mukitoka lihimate meina hizeko gologí oletatove loko minoko aleko imoláa nene ahulamó. Ómasímo nenémíni itove loko ezáa mola gamena nene alitokago vejená mukitoka kugutó vizitove loko nogilimó nenémíni avevezahaváa utó okago gelekune. ⁷^c Ámina gakó lo utó oaká ve itó aposolo loló itane loko Ómasímo nelémo etó okago nouve. Zuta ve minamamolaloka gakó gihila gele alévolé oaká gakó mogona lainim-oketatane loko nelémo etó okave. Nene soza lamuve. Lamaná noluve.

⁸Nenemú numutó namató monó gilina vejená keza kizapaló moloko itó lova leta lava leta nomitimó kigika gizopa lo miniko kigizani ali otiki numuna litave loko noluve. ⁹^d Itó vená keza gineganéini ali lamaná iki luhiiiki ali hita hita iki mihina itave loko noluve. Itó ve kumu hilitune liki gotóini zopova haitopaitó gonanalisi amitave. Gonanalisi netá golivagi itó luhoaká gó luhuvagi nene luhamitamó neve. ¹⁰Monó gilina vená nenete etati lelegító minatamómámíni iki lamaná iki iki miliki itatímo gineganéini loló ino. ¹¹Vená keza legesó iki limiki miniki kagata gili vevesi miniki gakó gilitaze. ¹²Vená neneta monó tisa lílí itamope itó ve kivilegeko gizapa oketatune litamope nenemú gele kemesá amuve. Monó litakú nene keza gakó lamiki legesó iki minataze. ¹³^e Lá itakumú nene Atani nene goí oko alémo utó okago Evani nene alika alémo utó imó. ¹⁴^f Itó Atani nene Satá gimivagú molamimó neve. Evani nene gimivagú molokago, gele ameake pelevesava ale utó ikumú noluve. ¹⁵Lá okamóza, vená keza monó gili alévolé itamó itó vejená makó kigika kimitamó itó kigika gizopagi minatamó nenémíni agikagú miní amiki némini manámíni osá nene netá golesa okatune liki kugupe gizapa iki minatamó nene, izegipa nigetiko Ómasímo kugutó vizinogo ive.

Pastoli hozaló minoaká gakó

3 ¹Makolímohe makolímohe pastoli minatove loko litimó nene, hoza gihilamú linogo ive. Nene gakó gihila lamaná neve. ²^g Itó pastoli loló iti ve nene, lihimavala nomitimó minoko ganakutí vená hamokó aleneiti vémo minatize. Némini manámíni osá golesa okatove

^c 2:7 2 Tim 1:11 ^d 2:9 1 Pit 3:3 ^e 2:13 Apí 2:7 ^f 2:14 Apí 3:1-6 ^g 3:2-7 Tae 1:6-9

loko agupeva gizapa oko minatize. Legesó oko zou loko minatize. Veno vejená ikikoma nasahlí oketoko kelémo molatize. Lainim-okimiaká hoza nene gele vevesoko ale hee loko alitize. ³Negi nagamí mukí nokoko negi hizemitive, itó negi nagamí nokoko lovaga loko lova ale utó amitize. Eza legesó oko hulu oko minoko, moni henoniló agika molamitize. ⁴Ezáa vená izegipala legesó oko lamaná oko gizapa oketoko kagata aleko kelémo vevesokiko, limiki miniki gelekelé itataze. ⁵Ve makó ezáa vená izegipala lamaná oko gizapa oketamitimó nene, Ómasímini vejenala zuha nana oko gizapa oketative. ⁶Itó monó nagamí izoha holati ve makolímo pastoli loló amitive. Nenémo ezáa agupe aleko itekiko, Satá eza amimika lokiko, lolímini mututoni loló okatize. ⁷Ómasímini vejenala zuha lilí ama vejená keza ve makolímini mogonamú giliko, etokiko nene, áisi nene pastoli loló itive. Aí amé zikiko nene, Satani gelehugú apelekatize.

Monó gelekelé ve minoaká gakó

⁸Ve makó keza monó gelekelé ve loló itune liki áminagó iki ve zouváa minataze. Keza genezáini lositaki minamitave. Negi nagamitó ve minamitave. Moni henonimú mumuzó amitave. ⁹Lelí monó imane asuguná oko minatotí mota utó okamó nene ali gikitiki miniki, kigikagú gakó golesa minamiko minataze. ¹⁰Keí nene goí iki mulúikú hiziki mogonáini ánigikiko, etokiko, monó hoza nene kimikiko monó gelekelé ve lilí itave. ¹¹Ámináminiki venáini keza zou liki minataze. Netá nemú manamú osá golesa okatune liki kugupeló gizapa itave. Venáini iki miliki itamó nenémo gihila loló onoi vete monó gelekelé ve lilí itave. ¹²Keza ganakutí vená hamokó alinita ve nenete ámina hoza alitave. Vená izegipáini zuha vatí iki gizapa ikitatave. ¹³Lá iiki monó hoza alitamó nene lamaná okikoma kigikámini henoni lamaná nene keitoka minanogo ive. Izesu Kilistotoka viki gímizeakakumú gakó vávani iki li utó inigave.

Lelí monolímini asuguná gakó

¹⁴Neza nene noanitoka litá oko vitove loko gelekumóza, imane luhuva gizo nogumumó nene, ¹⁵netá makolímo nagá zekiko nominugoma geza láa loko gilitane loko luhuva imane gizo nogumuve. Léisi nene alévolé ve Ómasímini vejenala zuha aí lapusava lilí iiki aí gakó gihila hizi lé ita vejenalitini holúikú mininake, oko moloko itunimó nenémini mogonamú luhuva imane gatokoko gilitane. ¹⁶Lelí monolímini asuguná gakola halá geko minamó nenémini gihiláa Izesuni mogonamú láa liki li utó iaká niamó nene, golivagi neve:

Áisi nene lelí lugupe ale luhoake utó imó.

Sikalahulímo aí mogonáa ale utó igo hee loko minamó.

Ageló vejenalite aí ángamó.

Numutó namató vete aí gakola gili asú amó.
Mikasiuka veganalite aikumú gili alévolé amó.
Okulumá lapanalaló alémoko itimó.

Sozaló monó ve alika utó itakumú limó

4 ¹Sikalahulímo lo utó oko láa loko loaká noive: Minomo noiteko alikaloka ve lugáate monó ahuliiki kilími gopa napa iaká nia holositini gakó gili alinigave. Itó ámina holositini soza saza gakotó viki gímizitave. ²Ámina soza sazaló ve nenete kigikámíni gakola gili ahuliaká niago mota lí okagove liki vejená kogoka vizeke láa liki lí kimiaká niave: ³Vená alemiki gohuna minalo, itó nosánetá lugáa namiki mosiaká ilo liki liaká niave. Ámina nosá nene Ómasímo gili alévolé iki minata veganalite itó aí gakó gihila gili zagita veganalite agepoka liki hanuva natave loko ale utó imóma neve. ⁴Ómasilokatí utó onoi netá nene lamanakó neve. Nenemú nene agepoka loko ámina nosánetá aleko noaká nune. Nenemú moseakaláa nomive. ⁵Ómasímo ezáa gokoláamule loko itó agepoka loko noaká nounikumule loko lusa genei netá nenazo, óe loko lonoi netá nomive.

Kilistoni gelekelé veva lamaná minoaká gakó

⁶Gele alévolé oaká nuni gakó itó monó gakó gihilaló voko gímizenimó nenémo gigikámíni nosánetá loló oko noiko, geza nene monó gele vejená gakó imane lo nogumumóma nene lo kemeko kelémo lamaná itanimó nene, Izesu Kilistoni gelekelé izegipala lamaná minanogo ane. ⁷Gitene gakokú monola nomive. Nene gakó gemegesa amezo. Geza nene monokú voko gele alévolé oko oko moloko itove loko, gigika alémo vávani oaká hoza alezo. ⁸Lugupe ale vávani oaká hoza nenémo lamaná otigí nemóza, monó gakokumú ligika alémo vávani oaká nenémo itína gamenaló nemó alika gamenaló nemó Ómasilokatí alévolé lemetameni lehizeletati netá nenazo, nene gihila lamaná neve. ⁹Nenémo gihila nenazo, vejená mukitoka nenémini gihila ali lá itave loko amuza moloko hozaváa alitune. ¹⁰Ómasi eza numutó namató vejená mukitó kugutó viziti ve noimóza, keikutí gele alévolé unimoláa lamaná lugutó vizeaká noi ve noinazo, nenemú Ómasi alévolé ve atikumú lagata losi gelemoko ageva oaká nounimómave loko miluma hoza lumupiló itekago hoza napa aleaká nune.

¹¹Gakó mukí lo nogumumó nene gili alitave loko monoka gele vejená lainim-oketozo. ¹²Géisi nene izegipa gosohá ve noane liki veganalite geikumú giliko lememino. Geza gele alévolé o minoko gigika gizopa lo miniko, gigika kemekoko oko moloko itanitímo itó monó litanitímo gili alévolé a vejená gapo kelepizeko geí gémegetatave loko lá itanize. ¹³Monó gotolaú gakó gato kemeaká hoza itó monó mogona lo utó oaká

hoza itó monó lainim-okimiaká hoza nene hozaló gigika ame gikitoko amezo. ¹⁴Goí oko nene monó olotiva vete kigizani nene gotokaló miliki lusa nigitiki Ómasímini agepagutí gako makó geikumú linató nene Sikalahulímo monolímíni zámúza lehizegetamó nenémíni gihiláa gopa okatize, alévolé oko gizapa oko minozo.

¹⁵Vegená mukilite monokú oko moloko anítímo napa omo novimó nene ángigikiko, laga kivisitíve loko, nénisi lo nogumu gako nene gigika molo gikitoko ale minozo. ¹⁶Gezaka gugupe gizapa oko itó monó lo kimitani gako avasavagi gizapa oko gako lo gumumó nene alévolé oko ale minozo. Lá itanimó nene, gezagi geí gako giliaká nia vegeñaki alévolé apá alinígave.

Monó gilina vegeñá nasahilí oketatuni gako

5 ¹Ozaha makó gako lo amitove loko nene, gahá ameko lamo. Améñegave loko alémo geha zeko lo amezo. Gosohá ve nene nugunamotamóneve loko némini manámíni oketoloko voko minozo. ²Gelehosi nene izónegítave loko gizapa oketoko némini manámíni oketoloko voko minozo. Vená gosohá nene mohó nugunamotamóneve loko némini manámíni oketoloko novoko nene, gezaka gugupe gígikaloka gizapa ozo.

³Itó gevoná vená nene kezáikó niiki muhelé ahelé iki niminíkoma, kelémo lamaná oko hize lé oketozo. ⁴Gevoná vená makolímíni izegipagi agapílamoki keza nene goí iki kezáini numúikú nene monó hoza alítiki alími lamaná itave. Lá iki nene emane amunaloka izóipiki améipiki gizapa ikitató nene, ámina lihima apasiki gelekelé itataze. Nenemú Ómasímo giliko lamaná inogo ive. ⁵Gevoná vená gihila nene kezáikó miniki Ómasímú gili alévolé iake, gamena gamena únaká neteká Ómasiloka liki voká voká lake kagata losi gelemake ageva iaká niave. ⁶Itó gevoná vená makolímó mokoló minókíkoma nene, aikumú nene agómulagi noihe liki lamiki ameni mota heleneive liki gililo. ⁷Gevoná venalítini lihímáini minamítimó miniko keitoka gako minamítive loko gako imane lo hukoko lo kemezo. ⁸Makó keza keí vegeñáini zuha itó keí vená izegipáini nene gizapa lamaná ikitiki nasahilí ikitamítamó nene, lelí monó ahuliake monó gelema vegeñá kiviligiki limiki minanígave.

⁹Gevoná vená makolímóhe makolímóhe ve hámakoki mino-loko noitiko kilisimasiva 60 minatimó nene, monó hoza koma naliko nosáneté koma ale utó oko native loko agulizá nene ámina venalítini kugulizá mina pepagú gizo molokako minino. ¹⁰Áisi nene oko moloko igo vegeñalite gili lamaná inamó noitihe, itó izegipala getokoko lamaná oko gizapa oketoko nasahilí oketamó noitihe, itó aitoka veno vegeñá ikago nasahilí oketoko kelémo molamó noitihe, itó áisi lemeko minake Ómasímini vegeñala zuha lugáa nasahilí oketamó noitihe, itó vegeñá miluma maluma gilikago

kelémo lamaná imó noitihe, itó vejená nasahilí oketoko némini manámini oketonoithe. Mogonáini nene loká miká okako, lá okogó neikoma, kugulizá gizatanize. ¹¹ Gevoná vená gosohá nenete lugulizá nene pepaló gizatane likikoma, óe loko gizamo. Veló goha vita netakumú kumu helepelé okiko, goí iki Kilistotoka viki gímizemóma ahuliake atiginá iki viaká niave. ¹² Lá iake nene, kezáini apí iki monokumú ale amegesaló molatune liki li huka gakó nene gili ahulikago, lihimáini iteko minokave. ¹³ Lá iake nene, numukú numukú itigá limigá iki hanuva gakó liki miniaká niave. Itó nenegó nomive. Keza notuni mihina ake hanuva gakó gopa napa gakó golesa liva liva ake, vejená makolitini netá matakú gavakavató mihina iaká niave. ¹⁴ Nenemú nénisi láa loko noluve: Vená gevoná gosohá keza veló goha viiki izegipáini geti miliiki, kezáini numukú makó miniki aliki ita vejená gizapa lamaná ikitatave. Lá iki niiko, lelí gala ve nenete kegepa zikiko, lelikumú gakó golesa lamitave. ¹⁵ Gevoná vená lugáa keza litá iki latila oaká gapoló vake, Satani ámegetiki viaká niave. ¹⁶ Izesukumú gele alévolé onoit vená makolímíni zuhagutí gevoná vená makó nitamó nene, áisi nasahilí oketative. Lá noiko, monó gele vejenalitini mukitó netáikutí alemiko, monó gele vejenalite keza gevoná vená kezáikó minamoláa nene hizi lé ikitatave.

¹⁷ Monokú olotiva ve keza hoza alikiko, lamaná okikoma nene, monó vejenalite meinaváa miní amiki napa iki kimitave. Monó li kimiki lainim-ikimiaká hoza alévolé iki alita vete nenémíniki aliki itiki alitave. ¹⁸ ^h Meinava alitakumú nene monó gotolaú luhuva láa liki gizinamóma neve:

Pulumaká nenémo hoza aleloko novike nosánetá natove loko noikoma, agepaló gahumá itamilo. Hanuva natize.

Itó gakó makó láa liki luhuva gizinamóma neve:

Ve makolititoka hoza alita ve nenete ámina vegutí meinava alitaze.

¹⁹ ⁱ Ve hámakó nenémo monó olotiva ve makó gonitó alémo molatove loko nolikoma, litá oko gele amemo. Vegená losihe losive makolehe lá ive liki likikoma, gelekoko gakó gilitanize. ²⁰ Ve makolímó lihima alekikoma, lugáa keza giliiki kelegesá ligitive loko monó gele vejenalitini kovogisaló gahá amezo. ²¹ Neza Ómasímíni itó Izesu Kilistoni avogisaló itó Ómasímó kelémo etó okago aí amatoka ageló niamó keí kovogisaló láa loko lo nohukogetuve: Gakó imane lo hukoko lo nogumumó nene gele alekoko gizapa okako lemeko akamino. Ve vená gakóini litove loko vejená lugáamú gelekako, iteko lemeko lamoko kelémo lisihé okogó noloko némini manámini loló oketozo.

Monó hoza alita ve kilími etó ita gakó

²² Ve makó keza monó hoza alitave loko litalilá oko lusa geketamo. Keí lihimáinímó geí gumupiló itekatize. Gezaka gugupe gigika gizapa okako

^h 5:18 Gapo 25:4; Mat 10:10; Luk 10:7 ⁱ 5:19 Gapo 17:6, 19:15

gizopa lo minatize. ²³Itó Timotiga, geza mulukagú akohú oká giviseká oaká noimó nene nagamikó namoko vain nagamí koma ma natane loko noluve.

²⁴Itó ve lugáatini golesa netáinímini lihima nene Ómasímo nogosani kimiti gamena velesá alitamigo litá oko utó oaká noive. Ve lugáatini lihima nene itína asuguná nemóza, alika utó inogo ive. ²⁵Ámináminoko vejená makolitini nasahilí hoza nene itína utó oaká noive. Itó lugaloka lá amitimó nene, asuguná halá geko minoloko voko minaminogo ive. Alika utó inogo inazo, nenemú monó hoza alita ve nene litá oko kelémo etó amitane loko noluve.

6 ¹Megusa izegipa lilí iki hagitana hoza aliki miniaká nia vejená keza nene ve napáinimú láa liki gilitaze: Vegenalite Ómasímini agulizá aliliki limiki monó aliki letikatanazo, nenemú ve napatémini kugulizá ale oteko gelekelé lamaná oketatune. ²Láa liki giliki, ve napáinimú nene kezagi lezagi hamó monó gele alévolé okunike, lisihé oko minokune liiki keikumú giliko lememino. Gelekelé izegipáini hozalotí meinávaa aliaká nia vete Ómasimú gili alévolé ina ve nianazo, itó gelekelé izegipáini nene Ómasímo agika kemeaká noinazo, nenemú lamaná iki gelekelé ikitatamó nene etanogo ive.

Moni henonimú mumuzó oaká gakó

Geza nene kelémo oteko gakó imane lainim-oketozo. ³Makó keza gakó gihila gili ahuliiki haitó monó lainim-ilikitatamó nene, itó Guivahanite Izesu Kilistoni gakó gili ahuliiki monó gapómini gakoki kemegeza amitamó nene, keikumú láa loko gilitune: ⁴Kezáini kagata giliki kugupe aliki itiki gakoláa ma gili vevesamave. Gakó miní amiki liva liva iki miniaká niamó nenémo kumu helekago, kemekugú níká lova leta lava leta iká itó alivi letivi iká, itó hanuva kemegeka liki gopa gakó líká, ⁵itó ligí ahuligí iki miniká ita netá ali utó iaká nia vejená nene kigika kagata gopa okago, gakó gihila ahuliake, monó nenémo moni henoni ale utó itihe liki giliaká nia vegenalitini holúikú ali utó iaká niave. ⁶Moni henonimú lugupeloka ale akalatuni netakumú mumuzó amoko mota alenouni netakumú lepa hizeko kii lo minatunimó nene monokú henonigi vejená minanogo une. ⁷Leza láa loko gelenoune: Izotege getikago utó uni gamenaló nene, netá matá henoni ma alekamune. Itó minoko hilituni gamenaló nene lugupe zapakó vinogo une. ⁸Nenemú nosánetá ginégane lelitoka ma nekoma nene, áminasí lelitoka neve loko hanuva zou loko minatune. ⁹Moni henoni sipisimú kumu heleaká noi vejená keza Satá giminikú molokiko, Satani gelehugú apilinigave. Lá niiki, ha netá negi netá kelémo gopa iti netá haitopaitokumú kumu helekiko, nenegú limiki latila iki golesa inigave. ¹⁰Moni henonimú mumuzó oaká nenémo haitopaitó golesa netalímini mogonáa neve. Vegená